



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՎԱՅՐԱՊԱՐԱՆԻ**

ՎԵՐԼՈՒԾԱԿԱՆ ՏԵՂԵԿԱՆՔ

**«Միջազգային էներգետիկ կորպորացիա» ՓԲԸ
2013 թվականի ներդրումային գործունեության
մոնիթորինգի արդյունքները**

ԵՐԵՎԱՆ 2014

ԲՈՎԱՆԴԱԿՈՒԹՅՈՒՆ

Նախաբան.....	3
ԲԱԺԻՆ 1. «Միջազգային էներգետիկ կորպորացիա» ՓԲԸ-ի	
2013 թվականի ներդրումային ծրագրի կառուցվածքը.....	3
ԲԱԺԻՆ 2. «Միջազգային էներգետիկ կորպորացիա» ՓԲԸ-ի 2013 թվականի	
ներդրումային ծրագրի կատարման ցուցանիշները և	
ներդրումների ձևավորման աղբյուրները	6
2.1. Ներդրումային ծրագրի կատարման ցուցանիշները.....	6
2.2. Ներդրումների ձևավորման աղբյուրները	7
ԲԱԺԻՆ 3. «Միջազգային էներգետիկ կորպորացիա» ՓԲԸ-ի 2013 թվականի	
ներդրումային գործունեության մոնիթորինգի արդյունքները	9
3.1. Սևան ՀԷԿ-ի վերազինման աշխատանքներ.....	9
3.2. Հրազդան ՀԷԿ-ի վերազինման աշխատանքներ.....	10
3.3. Արգել ՀԷԿ-ի վերազինման աշխատանքներ.....	11
3.4. Արզնի ՀԷԿ-ի վերազինման աշխատանքներ.....	11
3.5. Քանաքեռ ՀԷԿ-ի վերազինման աշխատանքներ.....	12
3.6. Երևան ՀԷԿ-ի վերազինման աշխատանքներ.....	12
3.7. Այլ ուղղություններով իրականացվելիք ներդրումներ.....	13
3.8. Ընթացիկ ծախսերով ձևակերպված ներդրումներ.....	15
ԲԱԺԻՆ 4. Հետագա սակագներով փոխհատուցման	
ենթակա ներդրումների ծավալը.....	16
Եզրակացություններ.....	17
Հղումներ օգտագործված նյութերին.....	18

Նախաբան

Սույն վերլուծական տեղեկանքը մշակվել է ի կատարումն ՀՀ հանրային ծառայությունները կարգավորող հանձնաժողովի (այսուհետև՝ հանձնաժողով) 2014 թվականի աշխատանքային ծրագրի 23-րդ կետի **[Որոշում 1]** և արտացոլում է «Միջազգային էներգետիկ կորպորացիա» ՓԲԸ-ի (այսուհետև՝ ընկերություն) 2013-2015 թվականների ներդրումային ծրագրի 2013 թվականի հատվածի (այսուհետև՝ ներդրումային ծրագիր) մոնիթորինգի գնահատականը: Փաստաթուղթը ներառում է ներդրումային ծրագրի և փաստացի կատարված աշխատանքների համադրությունը, իրականացված ծախսերի արդյունավետության, ինչպես նաև՝ սակագնով փոխհատուցման ենթակա ներդրումների ծավալի վերլուծությունը:

Վերլուծական տեղեկանքը կազմվել է՝ հաշվի առնելով «Միջազգային էներգետիկ կորպորացիա» ՓԲԸ-ի 2013-2017 թվականների ներդրումային ծրագիրը **[Որոշում 2]** և լիցենզավորված գործունեության վերաբերյալ ընկերության կողմից հանձնաժողով ներկայացված տեղեկատվությունը **[Հաշվետվություն]**:

ԲԱԺԻՆ 1.

«Միջազգային էներգետիկ կորպորացիա» ՓԲԸ-ի 2013 թվականի ներդրումային ծրագրի կառուցվածքը

«Միջազգային էներգետիկ կորպորացիա» ՓԲԸ-ի 2013 թվականի տարեկան ներդրումային ծրագրի շրջանակներում նախատեսվում էր տարբեր միջոցառումներ իրականացնել ընկերությանը պատկանող ՀԷԿ-երի վերականգնման և վերազինման, անվտանգության բարձրացման, էլեկտրատեխնիկական, հիդրոտուրբինային, հիդրոմեխանիկական, օժանդակ սարքավորումների փոխարինման, հիդրոտեխնիկական կառուցվածքների վերականգնման նպատակով: Ներդրումներ էր նախատեսվում իրականացնել նաև ընկերության բնականոն գործունեության ապահովման նպատակով՝ մեքենա-մեխանիզմների, մասնագիտական գործիք-


ների, համակարգչային տեխնիկայի և տնտեսական գույքի ձեռքբերման ուղղությամբ:

«Միջազգային էներգետիկ կորպորացիա» ՓԲԸ-ի 2013 թվականի ներդրումային ծրագրով նախատեսված էր իրականացնել 2 732,2¹ մլն դրամի ներդրումներ, որից.

- «Սևան» ՀԷԿ-ում՝ 96,0 մլն դրամ,
- «Հրազդան» ՀԷԿ-ում՝ 84,0 մլն դրամ,
- «Արգել» ՀԷԿ-ում՝ 904,5 մլն դրամ,
- «Արզնի» ՀԷԿ-ում՝ 340,3 մլն դրամ,
- «Երևան» ՀԷԿ-1-ում՝ 1 232,2 մլն դրամ,
- ընկերության աշխատանքների կազմակերպման համար այլ ուղղություններով իրականացվելիք ներդրումներ՝ 75,3 մլն դրամ:

Ստորև՝ գրաֆիկ 1-ում, ներկայացված է ընկերության 2013 թվականի ներդրումային ծրագրի ծավալների բաշխումը ըստ նպատակային ուղղությունների:

ԳՐԱՖԻԿ 1



Ինչպես երևում է գրաֆիկից ներդրումների մեծ մասը նախատեսվում էր ուղղել ՀԷԿ-երում էլեկտրատեխնիկական սարքավորումների՝ մասնավորապես

¹ Սույն վերլուծական տեղեկանքում նշված բոլոր գումարները չեն ներառում ԱԱՀ-ն:

գեներատորների ստատորների վերականգնման, գրգռման համակարգերի արդիականացման և մաշված սարքավորումների փոխարինմանը: Ներդրումների 25%-ը նախատեսվում էր ուղղել հիդրոտեխնիկական կառույցների՝ մասնավորապես Հրազդան, Արգել, Արզնի ՀԷԿ-երի դերիվացիաների և Երևան ՀԷԿ-1-ի պատվարի շինությունների վերականգնմանը: Նախատեսվող ներդրումների 19%-ի հիդրոմեխանիկական և օժանդակ սարքավորումներ ուղղության շրջանակում 511,8 մլն դրամից 427,8 մլն դրամը նախատեսվում էր ներդնել Երևան ՀԷԿ-1-ի հիդրոտուրբինային, հիդրոմեխանիկական և օժանդակ սարքավորումների փոխարինման ուղղությամբ: Այս ուղղությամբ մնացած 84,0 մլն դրամը նախատեսվում էր ներդնել Հրազդան ՀԷԿ-ի գնդաձև փականների ղեկավարման վահանակների արդիականացման ուղղությամբ: Ներդրումային ծրագրի մյուս ուղղություններով նախատեսվում էր ռելեական պաշտպանության սարքավորումների փոխարինում և ընկերության բնականոն աշխատանքների կազմակերպման նպատակով մեքենաների, մեխանիզմների, համակարգչային տեխնիկայի և այլ գույքի ձեռք բերում:

ԲԱԺԻՆ 2.

«Միջազգային էներգետիկ կորպորացիա» ՓԲԸ-ի 2013 թվականի ներդրումային ծրագրի կատարման ցուցանիշները և ներդրումների ձևավորման աղբյուրները

2.1. Ներդրումային ծրագրի կատարման ցուցանիշները

Համաձայն «Միջազգային էներգետիկ կորպորացիա» ՓԲԸ-ի փաստացի իրականացված ներդրումների մասին հաշվետվության՝ ընկերությունը 2013 թվականի ընթացքում կատարել է 2 507,1 մլն դրամի ներդրումներ՝ նախատեսվածի 92%-ը, որի արդյունքում շահագործման են հանձնվել 926,0 մլն դրամի հիմնական միջոցներ և իրականացվել են 32,4 մլն դրամի ընթացիկ ծախսեր: Մնացած 1 581,1 մլն դրամի աշխատանքները մնացել են անավարտ կամ ավարտվել են, սակայն դեռևս չեն շահագործվում:

Ստորև՝ աղյուսակ 1-ում, ներկայացված է հանձնաժողովի հետ համաձայնեցված և ընկերության կողմից փաստացի իրականացված՝ ավարտված ներդրումների ծավալների համեմատականը:

Աղյուսակ 1

N	Ներդրումային ծրագրի ուղղությունը, ենթաուղղությունը	Հանձնաժողովի հետ համաձայնեցված ներդրումների կանխատեսվող ծավալը		Ընդամենը կատարված ներդրումներ		Ներդրումային ծրագրի կատարման ցուցանիշը
		մլն դրամ	%	մլն դրամ	%	%
1	2	3	4	5	6	7
1	Սևան ՀԷԿ-ի վերազինման աշխատանքներ	96,0	3,5%	6,0	0,6%	6,3%
2	Հրազդան ՀԷԿ-ի վերազինման աշխատանքներ	84,0	3,1%	2,0	0,2%	2,4%
3	Արգել ՀԷԿ-ի վերազինման աշխատանքներ	904,5	33,1%	799,4	83,4%	88,4%
4	Արգնի ՀԷԿ-ի վերազինման աշխատանքներ	340,3	12,5%	0,6	0,1%	0,2%
5	Քանաքեռ ՀԷԿ-ի վերազինման աշխատանքներ	0,0	0,0%	31,8	3,3%	0,0%
6	Երևան ՀԷԿ-1-ի վերականգնում	1 232,2	45,1%	17,4	1,8%	1,4%
7	Այլ ուղղություններով իրականացվելիք ներդրումներ	75,3	2,8%	68,7	7,2%	91,2%
8	Այլ ներդրումներ			32,4	3,4%	
9	Ընդամենը	2 732,2		958,4		35,1%

Աղյուսակ 1-ից երևում է, որ ընկերությունը ներդրումային ծրագիրը կատարել է միայն 35,1%-ով: Ներդրումային ծրագրի միայն երկու՝ Արգել ՀԷԿ-ի վերազինման ու այլ ուղղություններով իրականացվելիք ներդրումներին ուղղված ներդրումներն են ընկերության կողմից կատարվել նախատեսվածի մոտ 90,0%-ով, մնացած ուղղություններով կատարված ներդրումները չեն գերազանցում նախատեսվածի 7%-ը:

2.2. Ներդրումների ձևավորման աղբյուրները

Ստորև՝ աղյուսակ 2-ում, ներկայացված են իրականացված ներդրումների ձևավորման աղբյուրները:

Աղյուսակ 2

	Ներդրումների ձևավորման աղբյուրները	Կապիտալացված և հետագա կապիտալացման ենթակա ծախսեր		Ավարտված աշխատանքների մասով	
		մլն դրամ	%	մլն դրամ	%
1	2	3	4	5	6
1	Սեփական ուժերով կատարված աշխատանքներից	198,6	7,8%	118,0	12,3%
1,1	աշխատանքի վճարման գծով ծախսումներ	11,7		6,0	
1,2	նյութական ծախսումներ	18,6		9,6	
1,3	տեղակայման ենթակա սարքավորումներ	40,1		40,1	
1,4	այլ*	128,2		62,2	
2	Կապալառու կազմակերպությունների միջոցով կատարված աշխատանքներից	2 272,3	89,5%	771,7	80,5%
3	Տեղակայում չպահանջող հիմնական միջոցներից	68,7	2,7%	68,7	7,2%
4	ԸՆԴԱՄԵՆԸ	2 539,5	100,0%	958,4	100,0%

*այս ծավալում ներառված են հիմնական միջոցների ձեռքբերման հետ կապված 32.4 մլն դրամի բանկային ծախսեր, որոնք ձևակերպվել են ընթացիկ ծախսերով:

Ինչպես տեսնում ենք աղյուսակ 2-ից, ընկերությունը 2013 թվականին ներդրումների իրականացման նպատակով ներգրավել է 2 539,5 մլն դրամ գումար, որից մոտ 98,7%-ը հանդիսանում է կապիտալացված և հետագայում կապիտալացման ենթակա աշխատանքների արժեքը, իսկ 1,3%-ը ընթացիկ ծախսերով ձևակերպված աշխատանքների արժեքը: Ներդրումների 89,5%-ն իրականացվել է

այլ կազմակերպությունների միջոցով: Այս ծավալում ներառված են նաև մատակարարների կողմից մատակարարման և տեղակայված սարքավորումների արժեքը: Սեփական ուժերով կատարված ներդրումների ծավալը կազմել է ընդհանուրի 7,8%-ը (այս ծավալում ընդգրկվել են նաև տեղակայման ենթակա սարքավորումների արժեքները, որը կազմում է ընդհանուր ներդրումների 1,6%-ը): Ներդրումների 2,7%-ը ուղղվել է տեղակայում չպահանջող հիմնական միջոցների ձեռքբերմանը:

ԲԱԺԻՆ 3.

«Միջազգային էներգետիկ» ՓԲԸ-ի 2013 թվականի ներդրումային գործունեության մոնիթորինգի արդյունքները

Ընկերության կողմից ներկայացված հաշվետվության ուսումնասիրության արդյունքում պարզվել է, որ «Սևան», «Արգել», «Արզնի» և «Երևան-1» ՀԷԿ-երում 2013 թվականի ընթացքում կատարված ներդրումներին համապատասխան կապիտալացվել է 95,8 մլն դրամի վարկի տոկոսներ (29,9 մլն դրամը ավարտված ներդրումների մասով): Նշված տոկոսները սակագնով փոխհատուցման ենթակա չեն, քանի որ, համաձայն ՀՀ հանրային ծառայությունները կարգավորող հանձնաժողովի 2012 թվականի նոյեմբերի 21-ի N462Ա որոշման 2-րդ կետի 2-րդ ենթակետի, ներդրումային ծրագրի շրջանակում իրականացված ներդրումների արդյունքում շահագործման հանձնված հիմնական միջոցների մնացորդային արժեքի նկատմամբ յուրաքանչյուր տարի կկիրառվի 10 տոկոս շահույթի նորմա՝ մինչև հարկումը: Այսինքն, 2013-2017 թվականների ընթացքում իրականացված ներդրումների նպատակով ներգրավված ֆինանսական միջոցների սպասարկման ծախսերի սակագնով փոխհատուցման հարցը արդեն իսկ կարգավորված է վերը նշված որոշմամբ:

Ստորև, առավել հանգամանալից, ըստ ուղղությունների, ներկայացված է ընկերության կողմից 2013 թվականին իրականացված ներդրումների ծավալը՝ հետազայում դրանք սակագնով ամբողջությամբ կամ մասնակի փոխհատուցման տեսանկյունից:

3.1. Սևան ՀԷԿ-ի վերազինման աշխատանքներ

2013 թվականին «Սևան» ՀԷԿ-ի վերազինման ուղղությամբ նախատեսվում էր ներդնել 96,0 մլն դրամ գումար ՀԷԿ-ի էլեկտրատեխնիկական սարքավորումների փոխարինման ուղղությամբ:

Փաստացի կատարվել են 305,2 մլն դրամի աշխատանքներ, որի արդյունքում շահագործման են հանձնվել 6,0 մլն դրամի հիմնական միջոցներ: Մնացած՝ 299,2 մլն դրամի N1 և N2 գեներատորների ստատորների փոխարինման և գրգռման

համակարգերի արդիականացման ուղղությամբ կատարված աշխատանքները մնացել են անավարտ:

Ավարտված ներդրումները կատարվել են «Թիվ 4 դրենաժային պոմպի էլ. շարժիչի փոխարինում» (1,0 մլն դրամ) և «Խմելու ջրի ջրագծի վերանորոգում» (5,0 մլն դրամ) աշխատանքների ուղղությամբ, որոնք համաձայնեցված չեն ներդրումային ծրագրով, ուստի ենթակա են նվազեցման սակագնով փոխհատուցման ենթակա ներդրումների ծավալից²:

Հաշվի առնելով վերը նշվածը, այս ուղղությամբ իրականացված ներդրումների ծավալից սակագնով փոխհատուցման ենթակա ներդրումների ծավալում ներդրումներ չեն ներառվել:

3.2. Հրազդան ՀԷԿ-ի վերազինման աշխատանքներ

2013 թվականին Հրազդան ՀԷԿ-ի վերազինման ուղղությամբ նախատեսվում էր ներդնել 84,0 մլն դրամ գումար ՀԷԿ-ի էլեկտրոտեխնիկական, հիդրոտուրբինային, հիդրոմեխանիկական, օժանդակ սարքավորումների արդիականացման ու հիդրոտեխնիկական կառույցների վերականգնման ուղղությամբ:

Փաստացի կատարվել են 19,1 մլն դրամի աշխատանքներ, որի արդյունքում 2,0 մլն դրամ ծավալով աշխատանքներ ավարտվել են: Մնացած 17,1 մլն դրամի աշխատանքները մնացել են անավարտ:

Ավարտված ներդրումները (2 մլն դրամ) ուղղվել են ՀԷԿ-ի նոր պահակատան կառուցմանը², որը նախատեսված չէր ընկերության ներդրումային ծրագրով, ուստի ենթակա է նվազեցման սակագնով փոխհատուցման ենթակա ներդրումների ծավալից:

Հաշվի առնելով վերը նշվածը, այս ուղղությամբ իրականացված 2,0 մլն դրամի ներդրումների ծավալից սակագնով փոխհատուցման ենթակա ներդրումների ծավալում ներդրումներ չեն ներառվել:

² Հաշվի առնելով, որ նշված ուղղությամբ՝ աշխատանքները համաձայնեցված են ընկերության 2014-2018թթ. ներդրումային ծրագրով, ուստի դրանց սակագնով փոխհատուցման հարցը կքննարկվի 2014 թվականին կատարված ներդրումները վերլուծելու ժամանակ:

3.3. Արգել ՀԷԿ-ի վերազինման աշխատանքներ

2013 թվականին Արգել ՀԷԿ-ի վերազինման ուղղությամբ նախատեսվում էր ներդնել 904,5 մլն դրամ գումար ՀԷԿ-ի էլեկտրատեխնիկական սարքավորումների արդիականացման և հիդրոտեխնիկական կառուցվածքների վերակառուցման ուղղությամբ:

Փաստացի կատարվել են 799,4 մլն դրամի աշխատանքներ, որոնք ամբողջ ծավալով ավարտվել են:

Այս ծավալում ՀԷԿ-ի N 1 և N 2 տուրբինային առանցքակալների վերակառուցման (61,4 մլն դրամ²) և ընկերության վարչական շենքի այգու ոռոգման համակարգի հիմնանորոգման (3,6 մլն դրամ) աշխատանքները, նախապես համաձայնեցված չէին և ենթակա են նվազեցման սակագնով փոխհատուցման ենթակա ներդրումների ծավալից:

Բացի այդ, նշված ուղղությամբ 29,9 մլն դրամ ծավալով ներկայացվել է 2013 թվականի համար կապիտալացված վարկի տոկոսներ, որոնք ևս ենթակա են նվազեցման:

Հաշվի առնելով վերը նշվածը, այս ուղղությամբ իրականացված 799,4 մլն դրամի ներդրումների ծավալից սակագնով փոխհատուցման ենթակա ներդրումների ծավալում ներառվել է 704,6 մլն դրամը:

3.4. Արգնի ՀԷԿ-ի վերազինման աշխատանքներ

2013 թվականին Արգնի ՀԷԿ-ի վերազինման ուղղությամբ նախատեսվում էր ներդնել 340,3 մլն դրամ գումար ՀԷԿ-ի դերիվացիոն ջրանցքի վերակառուցման նպատակով:

Փաստացի կատարվել են 292,5 մլն դրամի աշխատանքներ, որից դերիվացիոն ջրանցքի վերակառուցման ուղղությամբ իրականացված 291,9 մլն դրամի աշխատանքները մնացել են անավարտ:

Ավարտված աշխատանքը՝ 0,6 մլն դրամ, ՀԷԿ-ի աղբի կուտակիչի պատրաստման աշխատանքն է², որը նախապես համաձայնեցված չէր և ենթակա է նվազեցման սակագնով փոխհատուցման ենթակա ներդրումների ծավալից:

Հաշվի առնելով վերը նշվածը՝ այս ուղղությամբ իրականացված 0,6 մլն դրամի ներդրումների ծավալից սակագնով փոխհատուցման ենթակա ներդրումների ծավալում ներդրումներ չեն ներառվել:

3.5. Քանաքեռ ՀԷԿ-ի վերազինման աշխատանքներ

2013 թվականին Քանաքեռ ՀԷԿ-ի վերազինման ուղղությամբ ներդրումներ նախատեսված չէին:

Փաստացի կատարվել են 31,8 մլն² դրամի ակումյատորային մարտկոցների փոխարինման և աղբի կուտակիչի կառուցման աշխատանքներ, որոնք ամբողջ ծավալով ավարտվել են: Հաշվի առնելով, որ նշված աշխատանքները ներառված չեն ներդրումային ծրագրում, դրանք ենթակա են նվազեցման սակագնով փոխհատուցման ենթակա ներդրումների ծավալից:

Հաշվի առնելով վերը նշվածը՝ այս ուղղությամբ իրականացված 31,8 մլն դրամի ներդրումների ծավալից սակագնով փոխհատուցման ենթակա ներդրումների ծավալում ներդրումներ չեն ներառվել:

3.6. Երևան ՀԷԿ-ի վերականգնման աշխատանքներ

2013 թվականին Երևան ՀԷԿ-ի վերականգնման ուղղությամբ նախատեսվում էր ներդնել 1 232,2 մլն դրամ գումար ՀԷԿ-ի էլեկտրոտեխնիկական, հիդրոտուրբինային, հիդրոմեխանիկական, օժանդակ, ռելեական պաշտպանության սարքավորումների փոխարինման և արդիականացման ու հիդրոտեխնիկական կառույցների վերակառուցման ուղղությամբ:

Փաստացի կատարվել են 977,6 մլն դրամի աշխատանքներ, որից 960,2 մլն դրամի աշխատանքները՝ ուղղված պատվարի շինությունների վերակահնգմանն ու հիդրոտուրբինի փոխարինմանը մնացել են անավարտ: Մնացած՝ 17,4 մլն դրամի աշխատանքներն ավարտվել են:

Ավարտված ներդրումների ծավալում 15,8 մլն դրամ ծավալով կատարվել է ՀԷԿ-ի ակումյատորային մարտկոցների փոխարինման աշխատանքը, որից 0,6 մլն դրամ նվազեցվել է՝ սկզբնական փաստաթղթերի ուսումնասիրության արդյունքում:

Բացի այդ, 1,5 մլն դրամ ծավալով կատարվել է ՀԷԿ-ի աղբի կուտակիչի կառուցման աշխատանքը², որը նախապես համաձայնեցված չէր և ենթակա է նվազեցման սակագնով փոխհատուցման ենթակա ներդրումների ծավալից:

Հաշվի առնելով վերը նշվածը՝ այս ուղղությամբ իրականացված 17,4 մլն դրամի ներդրումների ծավալից սակագնով փոխհատուցման ենթակա ներդրումների ծավալում ներառվել է 15,2 մլն դրամը:

3.7. Այլ ուղղություններով իրականացվելիք ներդրումներ

2013 թվականին ընկերության բնականոն գործունեության ապահովման նպատակով նախատեսվում էր ներդրումներ կատարել հետևյալ ուղղություններով՝

- մեքենաների և մեխանիզմների ձեռքբերում,
- ՀԷԿ-երի անվտանգ աշխատանքի համար անհրաժեշտ սարքավորումների (շարժիչների, պոմպեր և այլն) ձեռքբերում,
- տնտեսական ապրանքների, գրասենյակային կահույքի և բջջային հեռախոսների ձեռքբերում,
- համակարգչային տեխնիկայի և աքսեսուարների ձեռքբերում,
- հսկիչ-չափիչ սարքավորումների և գործիքների ձեռքբերում,
- հաշվապահական ծրագրի ձեռքբերում:

Մեքենաների և մեխանիզմների ձեռքբերման ուղղությամբ 2013 թվականին նախատեսվում էր ներդնել 55,2 մլն դրամ 1 հատ ավտոբուսի, 1 հատ բեռնա-մարդատար մեքենայի, 1 հատ ինքնաթափի և 1 հատ դիզելային գեներատորի ձեռքբերման նպատակով: Փաստացի ձեռք են բերվել 2 հատ բեռնա-մարդատար մեքենաներ՝ 6,8 մլն դրամ և 7,3 մլն դրամ և 1 հատ միկրոավտոբուս 23,7 մլն դրամ ծավալներով: Փաստացի կատարված ներդրումների ծավալում 1 հատ 7,3 մլն դրամ ծավալով բեռնա-մարդատար մեքենան և 1 հատ 23,7 մլն դրամ ծավալով միկրոավտոբուսը² համաձայնեցված չեն ներդրումային ծրագրով, ուստի ենթակա են նվազեցման սակագնով փոխհատուցման ենթակա ներդրումների ծավալից: Բացի այդ, 0,8 մլն դրամ նվազեցվել է նախապես համաձայնեցված ծավալը գերազանցելու պատճառով:

Կայանների անվտանգության մակարդակի բարձրացման ուղղությամբ 2013 թվականին ներդրումներ նախատեսված չէին: Փաստացի կատարվել է 9,3 մլն դրամի ներդրում, որոնք մնացել են անավարտ:

ՀԷԿ-երի անվտանգ աշխատանքի համար անհրաժեշտ սարքավորումների ձեռքբերման ուղղությամբ 2013 թվականին նախատեսվում էր ներդնել 9,4 մլն դրամ՝ ՀԷԿ-երում շարժիչների, պոմպերի և ներանցիչների ձեռքբերման և փոխարինման նպատակով: Փաստացի կատարվել է 8,0 մլն դրամի ներդրում, որն ամբողջ ծավալով ավարտվել է:

Այս ուղղությունում ներառվել են նաև խոտինձիչ, էլեկտրական էներգիայի եռաֆազ հաշվիչներ, գազօջախ, հսկիչ-դրամարկղային մեքենաներ, մանեկի բանալիներ՝ ընդամենը 4,3 մլն դրամի և 1,7 մլն դրամի պոմպերի վերանորոգման աշխատանքներ, որոնք նախապես համաձայնեցված չեն եղել և ենթակա են նվազեցման սակագնով փոխհատուցման ենթակա ներդրումների ծավալից:

Տնտեսական ապրանքների ձեռքբերման ուղղությամբ 2013 թվականին նախատեսվում էր ներդնել 0,6 մլն դրամ: Փաստացի ձեռք են բերվել և շահագործման հանձնվել 0,7 մլն դրամի տնտեսական ապրանքներ: Նշված ծավալում 0,5 մլն դրամ ծավալով ձեռք է բերվել 1 հատ բարձր ճնշման սարք (HD 6/15 CX PLUS), որը համաձայնեցված չեր և ենթակա է նվազեցման սակագնով փոխհատուցման ենթակա ներդրումների ծավալից:

Համակարգչային տեխնիկայի և արքեսուարների ձեռքբերման ուղղությամբ 2013 թվականին նախատեսվում էր ներդնել 4,0 մլն դրամ: Փաստացի ձեռք են բերվել և շահագործման հանձնվել 17,3 մլն դրամի ապրանքներ: Այս ուղղությամբ 13,3 մլն դրամի ներդրումները գերազանցում են նախապես համաձայնեցված ծավալը և նվազեցվել են սակագնով փոխհատուցման ենթակա ներդրումների ծավալից:

Գրասենյակային գույքի ձեռքբերման ուղղությամբ 2013 թվականին նախատեսվում էր ներդնել 5,0 մլն դրամ: Փաստացի ձեռք են բերվել և շահագործման հանձնվել 1,2 մլն դրամի գույք:

Հսկիչ-չափիչ սարքավորումների ձեռքբերման ուղղությամբ 2013 թվականին նախատեսվում էր ներդնել 0,8 մլն դրամ: Փաստացի ձեռք են բերվել

3,7 մլն դրամի սարքավորումներ: Այս ուղղությամբ 2,9 մլն դրամի ներդրումները գերազանցում են նախապես համաձայնեցված ծավալը և նվազեցվել են սակագնով փոխհատուցման ենթակա ներդրումների ծավալից:

Բջջային հեռախոսների ձեռքբերման ուղղությամբ 2013 թվականին նախատեսվում էր ներդնել 300 հազար դրամ: Փաստացի ձեռք են բերվել 55.9 հազար դրամի ընդհանուր արժեքով 2 բջջային հեռախոսներ:

Հաշվապահական ծրագրի ձեռքբերման ուղղությամբ 2013 թվականին ներդրումներ նախատեսված չէր: Փաստացի կատարվել են 3,5 մլն դրամի ներդրումներ, որոնք մնացել են անավարտ:

Արդյունքում, ընկերության բնականոն գործունեության ապահովման նպատակով իրականացված ներդրումների ծավալից նվազեցվել են 54,5 մլն դրամի ներդրումներ և սակագնով փոխհատուցման ենթակա ներդրումների ծավալը կազմել է 14,2 մլն դրամ:

3.8. Ընթացիկ ծախսերով ձևակերպված ներդրումներ

Իրականացված ներդրումների կազմում ընթացիկ ծախսերով ձևակերպված ներդրումները՝ 32,4 մլն դրամից 5,1 մլն դրամի ծախսերը իրենցից ներկայացնում են «Սևան», «Արգել», և «Քանաքեռ» ՀԷԿ-երում կատարված էլեկտրատեխնիկական սարքավորումների ձեռքբերման հետ կապված ֆինանսական ծախսեր, որոնք ենթակա են ներառման սակագնով փոխհատուցման ենթակա ներդրումների ծավալում:

Մնացած 27,3 մլն դրամի ծախսերը ներառված չեն ներդրումային ծրագրում և իրենց բնույթով չեն կարող հանդիսանալ ներդրումային ծրագրի տարրեր, ուստի ենթակա են նվազեցման սակագնով փոխհատուցվող ներդրումների ծավալից:

ԲԱԺԻՆ 4.

Հետագա սակագներով փոխհատուցման ենթակա ներդրումների ծավալը

Սակագնով փոխհատուցման ենթակա ներդրումների ծավալի ամփոփ
վերլուծությունը ներկայացված է ստորև բերված աղյուսակում:

Աղյուսակ 3
մլն դրամ

1	2013 թվականի ընթացքում իրականացված ներդրումներ	2 539,5
2	2013 թվականի ընթացքում իրականացված անավարտ աշխատանքների արժեքը	1 581,1
3	2013 թվականի ընթացքում իրականացված ավարտված ներդրումներ	958,4
4	Սակագնով փոխհատուցման ենթակա ներդրումների ծավալից նվազեցված ներդրումներ, այդ թվում՝	219,3
4.1	<i>Հանձնաժողովի հետ չհամաձայնեցված ներդրումների ծավալը</i>	144,6
4.2	<i>Հանձնաժողովի հետ համաձայնեցված ներդրումների ծավալը գերազանցող ներդրումներ</i>	17,0
4.3	<i>Սկզբնական փաստաթղթերի ուսումնասիրության արդյունքում նվազեցված ներդրումներ</i>	0,6
4.4	<i>Վարկի տոկոսներ</i>	29,9
4.5	<i>Ընթացիկ ծախսերով ձևակերպված ներդրումներ</i>	27,3
5	2013 թվականի ընթացքում իրականացրած ներդրումներից սակագնով փոխհատուցման ենթակա ներդրումների ծավալը	739,1

Եզրակացություններ

Ամփոփելով «Միջազգային Էներգետիկ Կորպորացիա» ՓԲԸ-ի ներդրումային գործունեության արդյունքները հարկ է նշել, որ ընկերությունը ներդրել է ավելի քան 2,5 մլրդ դրամ ներդրումային ծրագրով նախատեսվածի 92%-ը: Շահագործման են հանձնվել 958,4 մլն դրամի աշխատանքներ, որից 704,6 մլն դրամը ուղղվել է Արգել ՀԷԿ-ի էլեկտրատեխնիկական սարքավորումների փոխարինմանը: Այս ենթաուղղությունը հիմնական ուղղություններով նախատեսված միակ աշխատանքն է, որն իրականացվել է ամբողջությամբ:

Հղումներ օգտագործված նյութերին

- Որոշում 1 - ՀՀ հանրային ծառայությունները կարգավորող հանձնաժողովի 2013 թվականի դեկտեմբերի 18-ի №459Լ որոշումը «ՀՀ հանրային ծառայությունները կարգավորող հանձնաժողովի 2014 թվականի աշխատանքային ծրագրին համաձայնություն տալու մասին».
- Որոշում 2 - ՀՀ հանրային ծառայությունները կարգավորող հանձնաժողովի 2012 թվականի նոյեմբերի 21-ի №462Ա որոշումը «Միջազգային էներգետիկ կորպորացիա» փակ բաժնետիրական ընկերության 2013-2017 թվականների ներդրումային ծրագրին համաձայնություն տալու մասին».
- Հաշվետվություն - «Միջազգային էներգետիկ կորպորացիա» ՓԲԸ-ի կողմից 2013 թվականին իրականացված փաստացի ներդրումների վերաբերյալ ընկերության 2014 թվականի փետրվարի 26-ի №2/9-008 գրությամբ ներկայացված հաշվետվությունը: